



Selasa, 1 Maret 2022
Ogen: Esekiel 28: 24-26



Ringan alu Teneng



Padan Tuhan man bangsaNa Israel e me padan keselamatan. Amin pe bangsa Israel e ndalani hukuman, labo rasa lalap. Lit paksana Tuhan mulahisa alu naluken kerina bangsa-bangsa si pernah nakiti bangsa e, si pernah nggombangi IA erkelangken bangsa Israel. Tuhan ngkapiti bangsaNa, IA jine si erperang ngelawan bangsa-bangsa e kerina. I je ituduhken Tuhan kekelengenNa man Israel, labo itimaiNa bangsa Israel mulahi bana bas kiniseranna nari. ItandaiNa terjeng i ja kengasupen Israel, adi arah gegeh ras kengasupenna labo banci ia pulah. Tuhan si maba ia mulih i bas negeri si ndauh nari i ja sedekah enda ia enggo merap marpar. Ipepulong Tuhan ia mulihken, janah itaruhkenna ku kuta kemulihenna. Bage ban Dibata gelah bangsa-bangsa doni enda pe ngidah uga belinna kuasa Dibata e.

Man Israel, iberekenNa kesempatan ringan i negerina jine. Negeri si enggo pernah iingani nini ninina Abraham, Isak ras Jakup. Negeri e nggo kin ipadanken Dibata jadi ingan bangsaNa tading, e maka itaruhkenNa mulihi bangsaNa ku je. Alu teneng bangsa Israel ringan i kuta kemulihenna, ipajekkenna mulihi rumahna, ras isuanina peken anggurna. Rumah e nuduhken ingan tading si aman, la kena las, udan entah angin si meter. Rumah e ingan arih-arih, ras isi jabu. Rumah e ingan muji Dibata si mereken kegeluhen. Peken anggur e nuduhken ingan si aman guna erdahin. La lit si nggagasi entah si ngolang-ngolangisa. Dibata masu-masu kerina pendahinna seh maka cukup kai si iperluken bangsaNa bas ndalani kegeluhen. Arah kerina dampar iperdiateken Tuhan, nakan pangan si cukup, keamanan jabu pe isikapken, peperangen pe lanai lit, keselamatan pe enggo ijamin. Tuhu, dame me sekerajangen anak-anak Tuhan. Situasi dame e me si erbahansa teneng rukur i bas ndalani kegeluhen.